

# DR JUNG STAINLEMER



## In dären Ussgoob:

Begriessig	2
ZTPV-Lager	3
Herbschtbummel 2008	4
Fundstügg	9
S Intärne	10
Rätselegge	11
Ussbligg	12

## Begriessig:

Sali zämme

S Johr 2008 neigt sich langsam aber sicher em Ändi zue und Wiehnachte stoht wider emol vor dr Türe. Drzue aane hebsch du grad s neuschte Exemplar vom Junge Stainlemer in dine Händ: was will me meh im Läbe? Mir wüesses nid und verliere dorum au gar kei Zyt euch kurz dr Inhalt vo dären Ussgoob vorzstelle.

Do wär vor allem emol en ussfürlige Bricht über eure Herbschtbummel in Fuulesee am Thunersee mit de drzueghörende Bilder.

Wyter hämmer no e Bricht vom Trainingslager vom Jungtambouren- und Pfyfferverband in Schönried. Bald nümmen erwähne mien mr wohrschynlig s Bilderrätsel wo mr au in dr aktuellen Ussgoob für euch vorbereitet hän.

E ganz e grosses Danggschön an die beide Vecchis, Raphi und Sandro, d Verfasser vo de beide Bricht in däre Ussgoob.

Dodrmit wär scho wieder alles Wichtige gseit und mr wünschen euch wie immer vyl Spass bim Lääse vom Junge Stainlemer.

Dom & Niggi

## Übungslager des ZTPV

Am Sonntag dem 3. August 2008 fuhren wir mit dem Zug nach Schönried.

Philipp Löffel, Janik Steiner und Sandro Vecchi waren auf dem Weg ins Übungslager des ZTPV.

Nach einem kurzen Empfang durften wir unser Zimmer beziehen.

Am Nachmittag hatten wir bereits die erste Übungsstunde.

In das Lager mitgekommen, waren 6 Pfeiffer und etwa 50 Tambouren.

Während dieser Woche lernten wir den Basler Marsch s` Draiórgeli und diverse kleine „Liedli“.

Die Tambouren lernten in verschiedenen Fächern die Kunst des Trommelns.

Am Mittwochnachmittag spazierten wir nach Gstaad, wo wir dann etwas Zeit hatten um uns etwas umzusehen.

An den darauf folgenden zwei Tagen übten wir noch fleissig für das kleine Konzert am Samstagmorgen.

Nach sechs langen Nächten und sieben langen Tagen war es auch schon wider vorbei.

Wir fuhren nach hause.

Sandro & Janik

**!!! Achtung !!! Achtung !!! Achtung !!! Achtung !!! Achtung !!! Achtung !!! Achtung !!! Achtung !!!**

**Aufruf an alle Jungen Stainlemer:**

**Kommt mit ins Übungslager des STPV in den nächsten Sommerferien!!!!**

## Herbschtbummel 2008

Am Samschtig, dr 13. Septämber, hän mir uns am halb 1, wie immer, in dr Schalterhalle vom Bahnhof troffe. Womr uns denn sichr gsii sin, dass mer alli hän, hämer uns mitm Zug ufe Wäg gmacht richtig Faulensee bi Spiez.

Im Zug inne simr in insgesamt 6 Grubbe ufteilt worde. Jedere vo dene Grubbe isch e Land zuteilt worde, passend zum Thema vom Wuchend: Staine Olympiade. Jedi vo dene Grubbene het miesse e Quiz über d Olympiade löse.



Vom Bahnhof in Faulensee simr denn zämme e kurzes Stückli zum Huus gloffe. Bim Huus acho, hämmer zerscht emol dörfe unseri Zimmer bezieh. Nach ere kurze Verschnuufpause het jedi Grubbe miesse e Fahne baschtle, wo später zämme miteme eigene Text zu dr Originalhymne vom jewelige Land prämiert worde isch.

Nach em Z` Nacht ässe hänn sich immer die Älteschte, die zweit Älteschte, usw. vo allne Grubbe zämme gsetzt und hän zämme Knoblet. Zobe isch me denn me odr weniger frie go pfluuse, damit me am näggschte Morge denn au fit isch für witteri Ufgoobe. Am Sunntig Morge simr alli fit und munter go Z` Mörgele und hän druf gwartet, dass es witr got.

Nachm Ässe hämer verschiideni Pöschte miesse absolviere. Mir hän miesse, odr villmee dörfe mit eme Luftgwehr uf Ballön schiesse, miteme färngstüürte Auto isch e chleine Hindernisparcours z bewältige gsi, denn hämr miesse e kleini Dänggufgoob löse, mr hän mögliggscht vill



Pünkt bim Dart miesse erziele und die letscht Ufgoob isch gsi, e Kerze mögliggscht schnäll dure Parcours z becho, ohni dass si abgot. Wo mer all die Ufgobe erledigt hänn, hämr ändlig widr dörfe ässe. Mir hän Z` Mittag gässe, e chli gschuttet odr sunscht chli chillt, bis d Rangverkündigung agstande isch.

Gwunne het die 1. Staine Olympiade d Grubbe Russland vor dr Elfebeiküschte und Dütschland.

Nach dr Rangverkündigung hämr uns ufe wäg gmacht richtig Bahnhof, sin dört ufe Zug und sin schliesslich mied und schlapp in Basel acho.

Es isch e geils Wuchenänd gsi!

Messi and Organisatore.

Raphi Vecchi





S Team us Russland: Nach neuschte Grücht sin si vor däre Olympiade vom ene Herr Stainitschov uffkaufte worde, wo nach eme neue Hobby gsuecht het..



Team New Zealand: Mit ere Special-Edition-Flagge



Team CDU: repräsentiert s Schwobeland (oder zumindest e Teil drvo)



Team Elfbeiküschte: sin ohni Drogba aträtete



Team Jamaika: Yeah Maaaaan!



Die villicht technologisch fortschrittlichschti Nation in däm Teilnahmefäld: SONY

Dä jungi Herr het gmeint dass me ihn nid gseht, wenn är uns nid gseht.... Falsch gmeint!



**vorhär**



**nochhär**

S Schlussbouquet vo dr Staine-Olympiade 2008



Amerkig: im Gegesatz zu däre Verastaltig in Peking, sin keini Fäll vo Doping-Missbruch bekannt worde.

## Fundstügg vom Monet:

Eso gfunde in dr offizielle Ranglischte vom Eidgenössische Jungtam-  
boure und -Pfyfferfescht in Zofige:

## 6. SPJ : Pfeifer Sektionen Piccolo

Rang	Sektion	Dirigent
1	Naarebaschi-Clique Basel	Stohler Nicole
2	UFS Basel	Fuchs Silvia
3	CPM Fifres et Tambours Genève	Blanc Marlyse
4	Wurlitzer-Clique Zunzgen	Rieder Manuela
5	Rätz Clique 1923 Basel	Stalder Irma
6	Barbara Club 1902	Näf Barbara
7	Tambours et Fifres de Meyrin	Perret-Gentil Yaelle
8	Junteressli Basel	Julliard Annika
9	Halbmond-Clique Frenkendorf	Stucki Barbara
10	Alti Stainlemer Basel	Mesmer Michel
11	La Bertholdia de Fribourg	Fasel Olivier

Kurioses het sich im Vorfäld vom Ufftritt vo dr Pfyffergruppe am  
EJTPF abspiilt:

Kurz vor em Ufftritt isch dr eigentlich Dirigant vo de Junge Pfyffer  
spurlos verschwunde...

Me mungglet Aliens heigen en entfiehrt, kurz druff aaben aber us  
Unbruchbarkeitsgründ wieder laufe loo...

Für ihn isch denn dr Michel Mesmer praktisch as Retter in höggschter  
Not yygsprunge und het d Pfyffergruppe souverän uf e 10. Platz diri-  
giert.



## S Intärne 2008

Am **20. Dezämber** isch es wieder e so  
wyt; S ultimative

## Staine-Wiehnachts-Intärns-

## Bryyspfyffe und Drummler 2008

goht wieder über d Bühni!

S wird wie jedes Joor dr spannend Wettbe-  
wärbsteil und dr unterhaltend Kürdteil ha.

Das ganzi foot am 16.00 bi dr St. Josephs-  
Kirche a. **Mer zelle alli uff euch**, seigs bim  
musikalische oder bim Kürteil.

## Rätselegge

Findsch die 5 Fähler im rächte Bild:



## Lösig vom Rätsel:

1. s WC-Symbol 2. d Brülle 3. s Staine-Emblem 4. dr Schnauz 5. dr Duume wo zum Finger wird bim Raph!

## Ussbligg:

So liebi Lüt fertig mit Triggs und Gägs, mer sin am Änd vo däre Uss-goob und hoffe euch het's basst, was der gläse hän. Für das Joor wärs vo unserer Sitte gsi und mer luege gspannt uf die kommendi Zyt, vor allem im neue Joor denne.

Dr Terminplan gseht in näggschter Zyt wie folgt uss:

Zerscht kunnt s **Staine-Wiehnachts-Intärns-Bryyspfyffe und Drumme 2008** wo am 20. Dezämber stattfindet. Denn het d Glygge am 23.12. **Geburtsdaag** und drno folgt jo scho d Wiehnacht.

Im neue Joor isch denn scho gly, nämlich am 10. Jänner, d **Blagette-Ussgob**. Noch em **Vogel Gryff** findet am 5. Hornig s **offizielle Bryyspfyffe und Drumme** statt. Je nach däm wenn dass die neu Uss-goob bi euch im Briefkaschte wird sy, isch s **Monstre-Drummeli** mit Staine-Bedailigung z erwähne wo am 14. Hornig afoot.

Mer wünschde euch e lukrativi Bescherig und schöni Fescht däg mit e huffe guetem Ässe, aber vergäset zwüscheduure s Iebe nid! :)

Schöni Wiehnacht und e guete Rutsch an alli Junge!

Dom&Niggi

In däm Sinn:  
Blybet cool!

